

# OMUKWETU

Registered at the General Post Office as a Newspaper



Meme Magdalena Sjamanah eshi a lesha ehokololo loluhepo lOvanamibia muZambia, okwe tu pukulula metoloko letu lopom.inghulo. Apa oku li nomushamane waye Erastus Sjamanah ou ve li naye mefiloshisho lofafadukipo kwinya. Efano ola kufwa yo moshifo osho "Kotimaa."

## EPUKO LYOMUKWETU LYA PUKULULWA

**Etoloko lyoshinyolwa shika; "Mu Zambia oye li monkalo odhigu, oshifo sha ti," ngiika omulundululi ina uva ko nawa omadhiladhilo gomunyoli. Kombinga yaakiintu mboka ya thiki kuZambia 30 pamwe nuhanona wawo, meme Anita Ailonga okwa holola kuty;"**

**"Aantu ngele itaa ka tuma mbala omakwatho, omikithi otadhi ka holoka. Aantu ngele itaa ka endelega momakwatho."**

**Ihe sigo ompaka inaku sa nando okanona. Aanona mboka ta valwa oye li nawa nohaa monikila moshipangelo oshinene shaLusaka, mu Zambia. Oshinyolwa osha kuthwa muKOTIMAA No. 3, 17-1-1975. Tandi mukundu,**

**Magdalena Sjamanah**



## OSHIGONGINGELEKA MENGELA NEIGI-DHO LYONDJOKANA YAVELKSWA

Oshigongingeleka shongeleka onkwaevangeli paLuther ya hangana muSuid-wes-Afrika, (VELKSWA) osha hulitha omutumba gwasho eti 11/4/1975 mEngela. li-lyo yoshigongi 45 pamwe naayenda yoshigongi ye vule 10 ya kala moshigongingeleka shotango okuza VELKSWA sho a dhikwa 1972, mOtjimbingwe.

Shimwe shomiikundathanwa inene moshigongingeleka shono osha li okukonga etokolo ngele oshi na ompumbwe natanango elongelokumwe lyoongeleka dhika mbali, li kokithwe sigo mokuninga ongeleka yimwe ayike onkwaevangeli paLuther muSuidwes nenge muNamibia. Nonando inapu kala oshilyo shimwe tashi kondjitha edhiladhilo ndika, onkene ngaa oshigongi sha gandja oonkondo kokomisi yelongekidho lyokuhangana, okukonga o-mauyele gamwe omape.

Moshituthi shevalo lyaVelkswa omumvo ngwiyaka mOtjimbingwe, aayilongi yomoseminali yuuteologi moka oya li ya dhana oshinyandwa shoka ya ti kutya, ehokano lyaELOK omufuko na E.L.K. Ongeleka yomUushimba, ombushiki.

Moshigongingeleka shaVELKSWA mEngela, omupresidende gwaVELKSWA dr. Lukas de Vries, okwa ti kutya, shiyaka kasha li ehokano ihe eyalekathano lyaagundjuka. Nomadhiladhilo goshigongingeleka pu ningwe Ongeleka yimwe, ogo omaigidho gondjokana ndjoka tayi ka dhikwa mbala pokati kOngeleka ndhika mbali.

Mpaka kapu na oshinima oshiye tashi kongwa, aawe. Elongelokumwe pokati koongeleka ndhika mbali ekulukululu, omumbisofu dr. L.Auala okwa ti nokuli ekulu kashi shi kuhokololwa. Ongeleka ndhika sho dha mono eipangelo lyadho, tango ya ELOK 1954 nopo ndjoka yomUushimba ELK, 1957, odha tsikile ashike nelongelokumwe ndyoka lya dhikwa kOmahanganatumo, lyaSoomi nolyaNdowishiland moka dha valwa.

Ekotampango lyaVELKSWA mokatendo kalyo 3, a otali ti ngeyi; VELKSWA ota tegelele aakriste ye yoshili ayehe ya kale noshimpwiyu shoku uvithila omuntu kehe evangeli lyombili nokulalakanena uukumwe wooitaali ayehe muKristus (Joh. 17: 21) u kale wa kola nou lwe-tike kwaayehe.

X X X X X X

**Oshoongalele shEengeleka domu-umbuwanhu waAfrika osho kwa li shi na okwoongala muBotswana petameko laMaalitsa, okwa hokololwa paife kutya kashi ko vali manga, sha lunduluka. Elalakano loshoongalele eshi okukundafana omaudjuu omoiwana youmbuwanhu waAfrika.**

**Efiku loshoongalele osho ola undwilwa kuSeptemba, 1-6 neudo, nonhele shiimba otai ka monika muMozambikwe.**

## NATANGO AATUMWA MUNAMIBIA OTAA TIDHWA

Omutumwa Hans-Jocken Messerschmidt, okwa li a yakula ombapila mundjoka a lombwelwa kEpangelo lya S.A. kutya na thige po oshilongo shika manga eti-31.3. 1975 inaali pita. Omutumwa Messerschmidt okwa kala omusita gwegongalo lyaaludhe mOutjo.

A hokana noku na okanona kamwe, omusita Messerschmidt okwa thigi po nale Namibia palaleko lyEpangelo, pamwe negumbo lye, ya shune kuNdowishilanda hoka ya zile ko 1972. Pankundana dhoshifo ongundu onene yaakwanegongalo mOvenduka oye mu thindikile kokapale pamukalo gwodemosttrasi mokuyelutha omapakete nokwiimba oondjimbo. (Die Suidwester 1/4/1975) Inaku hokololwa omatumbulo ogeni ga nyolelwa momapakete moka.

### Kalunga e tu gama

Momimvo ndatu nenge ne dha landulathana Ongeleka onkwaevangeli paLuther yomUushimba, nayo wo oya kanitha aatumwa oyendji pamukalo nguka. Efatululo kutya omolwashike, ihashi popiwa.

“Konyala osha ningi shaandjetu okutsakanekwa komathiminiko taga zi kEpangelo lya S.A.” Osho omuwilikingeleka mOngeleka ndjoka, Johannes Lukas de Vries e shi tumbula mehokololo ndyoka a gandja kiifo. Mehokololo ndyoka okwa ti:

“Shono twe shi yelitha nale, otatu shi endulula naampaka ishewe kutya, omathiminiko gopaupolotika wEpangelo lya S.A. kage na siku naga ka mweneka Ongeleka miilonga yayo. Osha nyenga nomomatidhagano gopademoni, Ongeleka yaKristus oya kala ya thikama. Nomoshilongo shika wo shooveta dha tungwa okuhanagula po Ongeleka, Kristus ote ki iholola kutya Oye Omuwa gwOngeleka.”

Kookuume ayehe muNamibia omuwilikingeleka de Vries ngoka kwa tiwa oye a li omuwiliki gwodemosttrasi yaakriste kokapale koondhila kaVenduka, okwe ya kumike omukumo yaa tyololoke, “Kalunga okwe tu gama,” osho a ti.

Tate Sakaria Nghikefelwa, ou a kala kuEnglanda eedula nhatu okulihonga elaka lOshikwanghala. Paife okwa aluka noku li moshilonga shokulundulula oinyolwa melaka lOshikwanghala kuKongo.





# EYUMUKO LYAKRISTUS SHOKA TALI TI KUTSE Mark. 16:1-7

Ngele tatu tala mehistoli, otatu dhimbulula aawiliki naapangeli yamwe ya li aanankondo noya simana, ihe sho ya si, sigo onena inaa yumuka. Otu shi okutumbula yamwe mpaka; George Washington muAmerika, Pharaoh gwaEgipiti, Taj Mahal muIndia nenge Lenin muRusland.

Oyendji oya li taa ti kutya Lenin ota ka yumuka noye antiKristus, ta ka ninga onyama, ta ningi satana. Osho omahokololo gopethimbo lye ga li ngaaka. Okwa li wo Mahatma Gandhi a simana muIndia, Adolf Hitler a simana muNdowishiland. Ayehe mbaka oya sile ihe natango inaa yumuka.

Dhiladhila Tshaka gwaZulu, Malan, Verwoerd ya S.A. Mandume Ndemufayo. Shikongo shaKalulu, Ipumbu yaTshilongo mOwambo. Oya li aanankondo, ihe nando gumwe kwa li e na ankondo dhi vule eso, aawe. Sigo onena inaa yumuka. Oombila dhawc natango inadhi eguluka.

## Jesus ta yumuka

Elaka ndika nali faalelwe apehe, nali tseyike kuayehe naapehe, kutya Jesus okwa yumuka. Aantu oya hala oku uva elaka ndyoka, kutya Jesus kee mo, oonkondo oonkwagulu odhe mu yumudha. Ota longo, nando yamwe taa tindi okwiitaala onkene ngaa elaka olya kola "Oye a yumuka."

Peso lyaJesus opwa li ethimbo lyegwaaleko, ethimbo lyegalikano muGetsemena okumangululwa kuKalunga meso. Ihe Kalunga ohole ye ota yi mu thiminike okugandja Jesus meso, opo twaa ye moheli. Aapangeli inaa mona ondjo muye, Pilatus oti iyogo kiikaha. Oya hogolola Barabas omudhipagi, Jesus a alelwe komushigakano.

## Ethimbo lyehagololo

Mesiku lyeyumuko oku na wo ehogololo. Aanamupya otaa ihogololele eikukutiko, okukala kokule naKalunga. Otaa hogolola omudhipagi. Ihe aanelago otaa hogolola okwitaala Jesus, oshoka oye awike ta uvithwa "a yumuka." Omulunde komushigakano okwa hogolola Jesus: Dhimbulukwa ndje nge wa yi moshilongo shoye.

Pethimbo ndyoka Jesus a si, aantu oyendji naalongwa ye, oya li ya tila. Akuhe kwa mwena. Oya fa yi itaala kutya ngashingeyi uudhigu otau ya. Odhoshili, uuna kwaa na Jesus, eso olyo tali popi ko, onke onawa oku uvithila ayehe mboka Jesus kuyo a sa, kutya "Oye a yumuka, inamu tila."

Otandi mu tsu omukumo one aagalikani, dhigineni megalikano. Osho wo oitaali mwa etha oshilonga sheni tamekeni okugalikana. Omagumbo ogendji oga etha Jesus moowandaha. Jesus a fumvikwa kii kunwa, ota langelwa kaakwiita yuulunde kehe. Tamekeni okugalikana. Jesus oku na omwenyo, otu uvu, ota yamukula, oshoka oye a yumuka.

## Ongula yeyumuko

Aakiintu oya yile kombila muumbanda nomoluhodhi lwawo. Ngashingeyi otaa mono sha shilwe tashi ya kumitha. Emanyana kali po, mombila omu na ngoka inaye mu tseyi oonguwo dhe tadhi adhima. Muumbanda wawo otamu ya elaka epe: "Inamu tila, oye okwa yumuka, keemo muka."

Inamu kala shito elaka lya fa ndika lya holoka ongula yesiku lyomwenyo. Opo mpaka pu na eigidho lyomwenyo, eitaalo, omukumo, omuka-

nka gwegongalo. Omolwashike otatu gongala mOsoondaha pamukanka nguka: "Oye a yumuka."

Muudhigu, moluhodhi, moluhepo, menyanyu wo muuvu, muunyengwi, mekano lyoye muupika woye, modholongo yoye onde ku etela elaka lyongula yOsoondaha, Oye a yumuka, inamu tila. Ngele oho itaale inima, itaala ano oohapu ndhika: "Oye a yumuka."

## Eyumuko lyaKristus kungame

- Oye shili Omuna gwaKalunga
- Oye omunashili, sho a tile: "Otandi yumuka."
- Okwe ya shili okuhupitha aanandjo
- Jesus okwe ya tu kale aayuuki.

Jesus oye omukanka gwehupitho, esindano lye meso, aalanduli ye otaa ka yumukila wo mowenyo. Oonkondo tadhi tula omwenyo, odho ndhoka Jesus ta longitha megongalo lye note li yumudha. Oshipango twe shi pewa osho shika, kutya tu uvithile yalwe eyumuko. Ohole yi sindane sho tayi ku thiminike okutaandelitha elaka epe kuayehe moohapu nomiilonga.

## Aanelago nena

Aalumentu aakiintu, aanona, aagundjuka naayehe mboka ya kandulilwa po omaudhigu gawo moomwenyo, oya dhiminwa po oondjo. linima ayihe pokati kawo naKalunga nosho wo nooyakwawo, oya yela. Otaa nyanyukilwa elaka epe: "Oye a yumuka."

Konima yeyumuko, oitaali otaa ka pewa omalutu omape, ondjala, omavu, nomahepeko oga hula po. Otaa kala pamwe naJesus aluhe. Eliiangano neso noluhodhi kayi kala ko we. Jerusalem oshipe osha tameke. Ehol.21:7. Omusindani oye ngoka ta thigulula mbika ayihe. Nosheelo nondjila tayi fala mo, oyo: "Jesus a yumuka."

Oku na eyumuko lyoitaali ya taamba Jesus, lil. 24:15. Oku na wo eyumuko lyaalunde mboka ya tindi okwiitaala Jesus noye mu ekelehi. Shaangoka ina monika moramata yomwenyo, ota umbilwa mefuta lyomulilo. Ehol.20:11—15. Otandi ku hiya, etha ondjila yeso, ila komwenyo kuJesus.

K. Dumeni

## EPANGELO LAAMERIKA OLA MONA EKUNDO LA DJA KONGELEKA

Ewilikongudu lohilonga shOngongahangano yOvakwaluther, muAmerika, ola tumina omupresidende woshilongo, omushamane Gerald Ford, omukanda, tau kumida epangelo li ninge po shihapu mokukwafela oshilongo shaNamibia osho tashi uka paife melipangelo.

Ewilikongudu eli oilyo yalo ya dja mEengeleki da kula nhatu eenghwaLuther muAmerika, ola indila kEwilikongudu laNamibia okwaamena oupuna woshilongo shaNamibia uha vakwe mo kovanailongo. Amerika ola pulwa yo okudiladila omahangano a Amerika taa longo muNamibia. Oshilonga shimwe sha indilwa kongeleki shi kwafe memanguluko laNamibia, okuyandja oimaliwa yoku lihonga kOvanamibia ava ve li paife muAmerika.

Omukanda ou owa tuminwa yo kominsteli yoikwapondje yaAmerika, omushamane Henry Kissinger, nokomukalelipo waAmerika kOiwana ya hangana John Scali okukwafa oimaliwa kOfikola yaNamibia ei tai tungwa muLusaka, Zambia.



## ELK NA ELOK ONGELEKA IMWE?

Opa pita paife eedula mbali diyadi eshi Eengeleka mbali eenghwaevangeli paLuther dOvalaule muNamibia, ELK na ELOK da hangana kumwe medina Verenigde Evangeliese Lutherse Kerk in Suidwes-Afrika (VELKSWA).

Medina eli Ongeleka keshe oya kala tai diinine omaufomhango ayo; ya diinina Epangelongeleka layo, tai longo oshilongatumo shayo, tai nangeke ovanashilonga vayo, tai ifana ovatumwa vayo kEhangantotumo oko ya dile, tai diinine omukalo welongelokalunga layo nosho tuu.

Oukumwe wEhangano eli owa holoka ashike moinenenima tai kumu Eengeleka adishe mbali ngashi; mehongo lovafita, mokupopila oshili yevangeli kEpangelo, nosho tuu.

Melongelokumwe eli okwa ningwa hano Epangelongeleka loukumwe, oshoongalele shovafita moukumwe noshoongalengeleka moukumwe okukundafana oinima ei i na sha naaveshe. Ongeleka keshe kaya li ya efa po sha shomuyo, opo i tambule sha shipe omolwelongelokumwe eli, ahowe.

Epulo ola penduka paife muVELKSWA kutya oshike mbela tashi imbi pu kale Ongeleka imwe aike onghwaevangeli paLuther muNamibia? Eshi osho sha kala tashi lalakanenwa nale nande kwa li kwa hovelwa manga onghatu yelongelokumwe alike.

Epulo lOngeleka i ninge imwe ola kundafanwa unene moshooongalele shovafita shoukumwe mOtjimbingwe pehovelolaMaalitsa neudo. Moshooongalele osho omupresidende waVELKSWA dr. Lukas de Vries, okwa ulika koinima imwe tai ngumauna po oukumwe wOngeleka yaKristus moshilongo eshi.

1) Okatongotongo oko a ti kutya oka ningina meemwenyo domaongalo etu, onghe hatu nyengwa oku ka kondjifa tu ulike oumwe womuKristus Jesus ou u li mOmbibeli.

2) Etokelwo lOngeleka mokufila oshiso ovo va imbwa keeveta dEpangelo meedolopa nokulikalekelwa pamatopaulo omihoko.

3) Omatongoko omehongo loukalunga nomehongo loukriste (Dogma) otaa nyonauna oukumwe notashi tu kaleke ovanangunga koshipala shOmupilisteli Omukulunhu, ou a ilikanena oukumwe wovana vaye.

4) Ediinino yo lotradisi melongelokalunga nekondjelo lonhele iha kane (Tu tye omuwilikingeleka ile omuwilikiongalo), aishe ei omushamane de Vries okwa ti, inai eta elao mOngeleka yaKristus.

Moshipopipiwa shaye shomapandja 6, omupresidende ou okwa hepaulula nokutya;

a) Fye otu li umwe mOmwene umwe, meitavelo limwe nomeshasho limwe muJesus Kristus.

b) Ounene wOngeleka onghwaluther apa, otau dulu okulumbakanifa mumwe omihoko adishe moumwe pahalo laKalunga, ou koshipala shaye aveshe ve na oufikepamwe.

c) VELKSWA ota dulu okuninga oshihopaenenwa shiwa kEengeleka dikwao moshinima shoumwe woshili ngashi wa hololwa mOmbibeli.

Kakwa li ou a kondjifa ediladilo lOngeleka i ninge imwe moshooongalele shinya nde omalipulo okwa kala ashike nhumbi tashi tulwa moilonga. Okukonga natango enyamukulo moshinima eshi, osha undulilwa kOshoongaleleengeleka sha VELKSWA osho shi li ko muApilili ou.



**Omusamane Israel Neumbo**

### EHALELOYAMBEKO KOSHINYANYANGIDHO

Tse Aawambo atuheni tu thikameni tu hambelele Kalunga ketu sho e tu galulile ishewe Oshinyanyangidho shetu, shoka shi li omutaandelithi gwoohapu oontalala. Omapenda oga kala musho; Kangonga ta konakona omashina, Shajuka te shi telekele oondanda, Amkongo te shi wilike nEkanjio te shi nyolele.

Omuwa, Oshinyanyangidho shoye shi kankameka. Oohapu dhoye dhi taandele sigo okomushitwa gwahunina. Pa aawiliki yOngeleka yaElok oonkondo oompe. Koleka Auala, pameka Dumeni, kumika Ashipala ngoye ino dhimbwa Sirongo koKavango. Yelutha Shikomba mUukwanyama, Omuwa dhimbulukwa Amakuwa miigwana ya hangana. LyaAngula naShinana, oonyeka dhawo yakitha ya wape oku uvitha edhina lyoye Kalunga.

Ino dhimbwa po uudhinwa wetu sho twa dhinwa kiigwana iikwetu. Omuwa Kalunga ketu kaku na gulwe ngoka twi inekela, ngele hangoye awike Kalunga. Omuwa tu sila ohenda ngoye tu dhimina po oondjo dhetu. Okungoye awike twa yono Kalunga ketu.

Gamena wo aamwameme pondje yoongamba, u ya gamene koomwenyo nokomalutu, ngoye u ya galulile nombili muNamibia.

**Neumbo**



## MWA KUNDILWAPO KUAMAKUTUWA

Tatekulu Jason Amakutuwa, omutonatelishitayinengeleka shUuninginino ngoka e li ngashingeyi metalelopo kombanda yomufita ota kunditha iilyo ayihe yOngeleka yaELOK. Mombilive ndjoka e yi nyofele kOmukwetu okuthikitha omakundo ngaka omutonateli okwa ti:

"Kundweni Aakwaeloka nekundo lyOmuwa omuyumudhwa, Kristus omusindani. Oye omwonyo gwetu, ote tu thikitha meadhimo ndele odigolo tii ka yaka.

"Okoko ndi li huka kOshitunda shaNekulu. Megumbo onda zile mo eti 26.2.1975 nonda yi kE-pangelongeleka kOniipa. Onda adha owala A-sser Lihongo ta ti: "Twa hangesa nkera hena, nyame tani ndindire Makambuli ntene ta wiza tani katuka."

"Sho nda yi mombelewa yomukuluntutumwa onda adha mo Pentikainen ngu a ti kungaye:" "Paife oto i u londe eshina mbela kuTsumeb, osheshi oto londo odila meti 28.2.75 u ye kuEngland."

"Otwawa yi ano nehauto lyokOmbwenge nomusita Lihongo notwa lala muTsumeb. Ondi idhenge montana tayi humbata Aawambo naana yAahefero, Niikondo yokOvenduka. Sho nda pula Ngata okwa ti, oshikoto otashi yi kOvenduka.

"MOtavi onda adha mo omutonatelishitayingeleka shaKavango, Natanael Sirongo, oye twa yi naye. Oomposi dhegwililila odha kotheke ndje sigo pukulu, Okariveva. Mpaka otwa topoka naSirongo, ta yi kOtiimbingwe. MOvenduka onde ya mo nongula yomapumputu. Sho lya yeluka, onda yi ku "Trip," (ombelewa yoopasa dhomondhila) ye oku na ndje po otekete yaNelomba.

Komatango onda yi mekambamba sho nda falwa kutatekulu Glindmeir. Pokapale kondhila otwa hadhwa notwi idhenge muNelomba lyomushindi gwombululu pohetatu. Ngika omulongo sho tagu dhenge, otu li muLuanda, Angola. Sho taku yele otu li muZurich, Switzerland.

"Nani otu li ngaa nooMwakisunga nooMaasdorp. Oongombe sho dhi li kiikwekwe, otu li muFrankfurt, Ndowishiland. Ngika ote takuma Oshiingilisa nokuli. Taa, onda dhilomatele ngiineel

"Sho tuu oongombe tadhi ka gwana, osho tu lwete omulonga gwaThemes mokati kaLondon. Tu londolokemo, ondu uvite taku tiwa: "How long do you stay here?" Ngaye te yi mo: "Two months only." Ye oku na ndje po oomwedhi hamano.

"Te tshulutshutsha nduno nasho. Kwa ti inda kombinga ndjika. Opo ihe te tala, ondi lwete Shipena ta keuka, ngaye momwenyo: Ondjengo ha yengwa. Oye li nomuhongi Seppanen Omusoomi namwene gwegumbo lyetu, tatekulu Ending.

Oya tula ndje mehauto tu uka kuLutheran Student House. Sho twa thiki mondjugo ontihetatu pombanda yoonkwawo, onda lombwelwa, opo mpoka. Osha li Olyomakaya.

"Omaandaha ongula, otwa topoka naShipena sho twa kala naye Osoondaha nokwa yi kuBirmingham kosikola ye. Ngaye te yi koyandje kuPitman School of English. Taa, omangulu ga londathana, omuntu u li ashike mezile.

"Ondi na po Omweetiopia gumwe, oye u ulukile ndje osikola ndjoka. Otwawa yi kuNotting Hill Gate tu uka mevi tu li kepaya sigo twa londo eshina lyolutenda. Sho twa thiki posasiyona Nottingham Court Road, otwa heluka nde tatu mbunyuka mevi tatu ende sigo oposikola.

"Onda konakonwa nonda kala mosikola ndjoka. Komatango kete tshitshimba ihe nasho. Ondi na po Omusudani gumwe ngoka u ulukile ndje kuNotting Hill Gate. A kwatha ndje hewa. Ngula kushe, inandi ya ko we kosikola ndjoka, onda yi kuyimwe yedhina London School of English. Oya konakona ndje ndele sho yi na ondilo, onde yi sasana ete yi kuStanton School of English, hoka ndi li nee.

"Aalongi, aalongiingii. Oshoka owala nda tya ko, ando tashi tala (Oshiingilisa) omalwa. Aantu aanambili, utalala nomutenya ondjatha ngaa. Ote kala huka shigo Apilili, inamu dhibwawa ndje momagalikano geni.

"Kalunga okwa longo iikumitha ya nyenge ndje, sho Ongeleka yetu nEtumo lyaSoomi ye etitha ndje huka. Kalunga ne ya laleke nuuyamba miikwanegulu muKrstus Jesus.

Jason

KEpangelongeka, tate Amakutuwa okwa adhika a nyola nale ebandulo lye, moka a hokolola olwendo lwe nokuthika kwe hwiya. Okwe ya totele oshitewo tashi leshwa ngeyi:

1. Mehauto nda londa,  
Mu meshina nda londa.  
Mu Nelomba nda londa  
Nde ya ndi li mombanda
2. Tii mu kundu aakwetu,  
Kundweni ne yakwetu  
Ondi li kuEuropa  
Nde kaku na elopa
3. Ngele itii mu mono  
Muya tandi mu mono  
Omegumbo lyaTate  
Omegulu puTate



Okanona Mbangokamwe komoonakufadhu ka po.

## INAMU VA DIMBWA MOMAILIKANO ENI

Ohandi kundu Ovanambia amushe naavo yo va fiwa po kovaholike nokookaume kavo va ya pondje yaNamibia. Ope na vamwe va nyika oluhodi omolwokudja po kwovamwameme moshilongo. Oshilonga sheni oku va iilikanena ashike oufiku nomutenya opo vaha dimbwe po Omwene wavo mokukondjela emangulukoko letu.

Inamu pukifwa kovahongololi, inamu twalwa moilambo kovapofi nye inamu tewa omukumo kovanandumbo nokovakengeleli vedu letu. Kaleni mwa pama momhepo yedu letu, mu na eteelelo kutya venya ove lile po ouwa wetu.

Ashike ava tava i nava tale tuu keembinga adishe, opo oshiwana shiha hepe omolwetu. Apa ote diladila oipangelo neefikola, pa kale ngaa pa fyaala ovayakuli, unene ovapangi. Ou yo to fyaala po, ino tila okumakula okanya koye, shimha tuu u shi shii nokutya ou li moshili noto kondjele osho sha yuka. Dr. Martin Luther Kingi okwa tile:

"Lwila oshili naKalunga ota kala alushe kombinga yoye."

S.C. Nghikomenwa



## ETALELOPO LANGE KUANGOLA

Onda li nda fikama mOngwediva okuya kwinya momapya etumo muAngola. Onda ya pOshikango okutambula opaasa, opo ndi ye. Kapwa li sha shimwe tashi fininike nge ohole aike, nande opolifi ya S.A. oya li inai hala ndi ye ko. Onda kendabala ngaho opo ndi ye tuu.

Okwa li ku na odula fiku olo yepoola. Nghi na eumbo ndi shii mo nande. Onda lokwa oufiku aushe. Ame Ovaputu ohai va tila okuya momambo avo. Ongula kwa sha, outalala noikutu noikumbafa, oya lokwa.

Otwa li ngaho novanhu vamwe tava di konasalesa kEngela, va dile ko Sulu, konima yoFoti, koRocado, nde katu liudite nawa. Mondjiva otwa dja mo 8,00. Eshi otundi 11.00 tau denge otwa fika moFoti.

Otwa pula nee omukunda Oshangalala, ku na omufitaongalo Noa Ndeutapo. Onda li ku pula ou, ahowe, keshe umwe ota ti kutya ke shii ko. Ame naame nghi udite ko Oshinghumbi. Ovanghumbi omusita otava ti, elombe. Ame nghi shii nee elombe.

Osho nda mono po omufinghenda umwe, oye nee a ulikila nge ondjila nokupange meekulu umwe fiyo opootate Ndeutapo kOshangalala. Ope na ngaho eemhadi dile.

Oko nee nda kala nokweendaenda hai tale etumo nhumbi epya la tilyana, ndele ovalongi ovanini. Oh, peenhele apa nda enda opa hepa nai. Ovanhu va hala ehongo, ndele omulongi ke po. Osho nda enda ngaha fiyo okOluvango, (Sa da, Badeira), eekilometa 300 oku dja moFoti.

Alushe eshi nda kala handi ende novanhu kwinya, onda hangika kediladilo kutya, mbela eshi ovanhu vamwe vehee na vali oilonga naava inava mona omhito okuya meefikola dopomabada omolwomatambulo a nyika oikuni, oike itava ka longela mbela metumo? Mbela Kalunga ite ke tu pula nande eshi ovanhu vehee na ovalongi, vo opo ngaho ve li? Pakutala kwange.

Onda hala okutumbula nomufindo kutya, tu yeni moilonga yOmwene, tu yeni metumo kuAngola. Paife Omwene okwa longa mokuha monika, Omuputu ita ningi sha vali ovanhu. Efimbo laye ola pwa po, omailikano ovaitaveli, okwa fika. Kalunga okwa nyamukula.

Tate Ndeutapo kumwe novakwetu meitavelo kwinya, otave mu kundu unene. Ovanyasha vakwetu, tu yamukuleni, tu yeni. Ofye tu li po tu na eenghono dihapu inatu fa ovakulunhu.

Ootate nomeme, eshi nda tya, fye otu na eenghono, inai tya, inamu ya ko, aye. Otuhe mu twile ashike omhelo. Atusheni tu yeni. Ovanyasha vaAngola otave mu kundu nomushamane umwe tate Walende Shangalala.

Maria Vahaleni Kamati  
Ongenga

## OVAFINDJALA VA DIMBULUKIWA

MuEtiopia omo ondjala ya kala tai manepo ovanhu efimbo lile, Ongeleka onghwaevangeli yaMekane Yesus, oya tokola iha ninge oshoongalele osho, i longifwe mokukwafa ovafindjala moshilongo.

Efanekomuvalu loimaliwa yoshoongalele osho oya tengenekwa i kale i fike peedola dOshietipia 50,000, konyala R70, 000. Oshoongalele eshi okwa li shi na okuningwa nale nokuli pehovelu lodula ei.

## OKOMBONI YAHALALI YA DHIMBULUKWA ETUMO

Aalumentu mboka haa longo mokomboni yaHalali, oya dhimbulukwa oshilonga shEtumo tashi longwa kOngeleka yaElok, noya tokola nayo wo ya faleko iikaha yawo. Oya gongele iimaliwa R 11,00 noya tokola dhi ka kwathe kepyatumo, Onankali, mUuzilo wOndonga. Mombilive ndjoka ye ende pamwe niimaliwa mbika omu na omadhina gaalumentu 26 no-

mwa tiwa ngeyi:

Otu umbu ongalo, tse aakwanegongalo yomOhalali, opo yi ka kwathe wo koohepele kOnankali, evangeli li taandele ngashi Omuwa Jesus e shi ti. Aakwanegongalo ayehe oya zimine yi ye kOnankali.

Stefanus Ndundu

**OMUKWETU oti indile ombili kooitaali mbaka sho inaa vula okuholola omadhina gaagandji ayehe ngashi sha li shi indilwa. Kalunga mwene ite ke ya dhimbwa nando,**

## OMUTUMWA OLYELYE

Epulo eli ola nyamukulwa komubishopi Christopher Mwoleka, waTanzania ngaha: Omutumwa opo akale a wapalela oshilonga shaye shoutumwa na kale omunhu waKalunga, omwiilikani, nomuyakuli, Omunhu a tya ngaha, oilonga ya ye otai wapalele oshilonga shaye.

Nande na kale oku na onghatu melihongo laye, okwa li e na okuhafela oshilonga shaye okunangekwa meongalo lomoixwa, oku ka teka omeva komatope, ile okuninga oshikunino omolwokukalamwenyo. Okwa li yo e na okutambula oshilonga shokuninga amushanga womubishopi ile okuninga omushingili waye nokuli.

(Arica Acts)

**MUEQUATORIAL GUINEA, oshifo shimwe osha popya nokutya Eengeleka adishe daKatolika moshilongo nadi patwe nomakuma a longifwe po eendjuo dokupungula oinima. Oshifo eshi osha tonga natango tashi ti nokutya ovafita vongelegeka ya tya ngaho nava pashukilwe nawa, osheshi otava longo ongomahangano okutandavelifa oupika mupe moshilongo.**

(Africa Acts)

Linda N. Kalipi, Elim, ota ti: Onda yematele olwindji aakriste ooyakwetu pokugongalela poohapu dhaKalunga. HamOngengeleka amuke, ihe nopehala kehe oohapu dhomwenyo tadhii uvithwa po. Omolweitalo lyaa mo mutse, molwokwaa dhimbulula ewi lyOmuwa te li popitha aamati ye, tse otwa kala owala nokupopya nokukudhila.

Ino dhimbwa oohapu dhehupitho, nando dhi kale tadhii popiwa komudhinwa.



## SWAPO NOONKUNDATHANA

Swapo ote ekelehi omukalo kehe gwoonkundathana pokati kEpangelo la S. A. niilongo yaAfrika ya manguluka, ngele pwaa na eziminino lye (SWAPO) ngo-ka e li po medhina lyaantu ayehe ya-Namibia.

Osho omupresidende gwaSWAPO, Sam Nuujoma a popya. Okwa ti: SWAPO okwi ilongekidha okukundathana na S. A. ngele nani ota zimine kutya SWAPO oye tuu ta popi medhina lya-Namibia nonge S. A. ota hulitha po omulandu gwe gwomavigumbo.

(Die Suidwes-Afrikaaner 8/4/1975).

Kapuuu ota ti nokutya kombonda yomafuta hoka ya talele po omasiku ga zi ko noya kundathana naawiliki yOmapangelo gi ili nogi ili, oya galuka ko nomukumo, noonkondo, noonduge nonomatokolo ge na eitaalo kutya otaa ka sindana.

Omusamane Kauuu ota gandja omayele kEpangelo lya S.A. kutya ethimbo oli li po talie-ndebelele manga Epangelo inali hulitha po okatongotongo kalyo. Kapuuu ngoka ita zimine pu kale ongundu yimwe ayike moshilongo yopapolitika oyo yi inekelelwa ewiliko lyEpangelo, okwa tala wo kutya osho oshinakugwanithwa sha V.V.O. a longele kumwe noongundu dhuu-polotika ye e dhi kwathe niimaliwa.

(Suidwes—Afrikaaner 3-4-75)

Vernon Mwaanga, oministeli yoikwapondje ya Zambia, oya popya moshoongalele sheeministeli doilongo yaAfrika ya manguluka nokutya, Epangelo laye ina li tula po natango mokukondjifa okatongotongo. Okwa ti nokutya Epangelo la-S. A. ola itavela moinima inene okweefa Suid-wes, nde osho inashi fikwa musho omukalo kutya otashi endwa ngahelipi.

SWAPO oku na okuyandja enwefemo laye moshiwana ashishe. Itapu uya nande omhepo yokuyandja emanguluko moshilongo, fimbo Swapo e li pondje yeenghunda-fana. Ngenge otapu uya sha sha tya ngaha, Swapo ota fiminikwa a kwate kokomauta a kondjele emanguluko lovaluale. Osho omusamane Mwaanga a ti.

(Advertiser 9/4/1975)

Kaku na natango omadidiliko a yela nokutya Epangelo eli lokatongotongo ole lilongekida oku lidilulula. Eshi osha tumbulwa kuHamushanga Ndjai wouku mwe wEengeleka daAfrika (AACC), omufitaongalo Burgess Carr. Okwa ti:

Okwa penduka omalimbililo nokutya S. A. okwa tameka okulilandela omadiladilo Ovayafrika va ame kuye. Ovaenda va S. A. otava d'ulu tuu okuhafela okutambula oimaliwa yaye nokunangekwa meehotela, fimbo ovawiliki vomaduumbo mu S. A. tava ka hehela oimaliwa pondje? Osho hamushanga e lipula.

# SSSS

## OMADENGO OMOWAMBO A TWIKILWA

Elelo lohilongo shaUkwambi, ovapolifi valo novalongi valo aveshe, ova indikwa kohofa yopombada yaVenduka vaha ponokele vali oshilyo shaSWAPO Sem Shivute nomukulukadi waye Elizabeth.

Eshi osha dja momadengo a ningilwa meme Elizabeth kovapolifi voshilongo mOshakati momafiku a paasha, fimbo omulumenhu waye a kala ta kongwa a dengwe ile a dipawe, pahokololo lomukulukadi.

Fimbo ovanhu va li meyofa lombelela ei kwa li ya longekidwa kuSWAPO momafiku apaasha, ovapolifi vaGongo, okwe ya nde ta halakanifa onhingo ei. Mwene weumbo Asino okwa kwatwa po nde ta indililwa manga omafiku amwe modolongo yaUkwambi.

Omusamane Shivute ou kwa li ina hangika mongudu yoonakudengwa, pa hokololo lomukulukadi waye ou a dengelwa meumbo laye, okwa kala ta kongwa a dengwe ile a dipawe, nde ina monika fiyo ohofa ya lombwelwa oshinima eshi. Ovapolifi 15 mewiliko laNamupala, otaku ti ove na sha noshinima eshi.

Inapu pita efimbo lile, eshi ohofa yokombada yaBloemfontein ya vilikila Epangelo lOwambo liha kwate liha denge oshilyo shimwe shaSWAPO ile shaDEM-KOP.

### Ehoololo lOwambo otali ka tulwa moihokolola

Ohahende oya dile kOvenduka eti 5 la Apilili 1975 opo i konakone omahokololo kutya ovanhu mOwambo ova fininikilwa mehoololo lOwambo. Vahapu ova dile kOukwanyama nokOuninginino okuyandja oumbangi molwoshinima eshi. Natango ekonakono otali twikile mekwatafano nahahende David Soggot palombwelo lehangano leehahende Lorentz na Borne moVenduka.

(Advertiser 7/4/1975)

Omusamane A. H. du Plessis okwa li e na okumwena kaa lombwele we aantu kutya ye nongundu ye otaa ka simaneka etokolo lyAanamibia ndyoka tali ka za moonkundathana. Etokolo olini, sho omupresidende gwaSWANU, omusamane Gerson Veii a pula. Okwa ti:

Aaluudhe moshilongo shika oya yelitha nale shono ya hala, nokuli okuza 1946 uuna aaluudhe ya lombwelele o V.V.O nokutya yo oya hala okuza mo miikaha yOombulu. Omusamane Veii okwe shi popi nomuthindo a ti kutya;

Kapu na oonkundathana manga dhi shi okwiinekelwa, oshoka kapu na sha natango sha uvanekwa miinima mbyoka yi na okulundululwa. Okwa ti, shono shi na okuningwa po osho ashike kutya Epangelo li gandjwe miikaha yaaludhe.

(Advertiser 9/4/1975)



## EPANDULO LYEGONGALO LYALOMBE

Egongalo epe Elombe, mOndonga olya taamba nepandulo enene iimaliwa omo lwetungo lyegongalo ndyoka, ya zi komadhina taga landula mpaka:

1. Oskar Mbeeli okwa thikitha R24,40
2. Samuel Nepolo okwa thikitha R 7,00  
Aalumentu ayehe mbaka oya kala taa longo kOlange.

Otatu pandula wo kehangalyapya ndyoka lya zi kekondjo lyaamwameme mbaka:

1. Selma Amuthenu R 2,75
2. Helena Tomas R 2,20

Aavenduka ne, inamu dhiladhila kutya otwa dhimbwa oshilonga sheni oshiwanawa mokukongela oshinyangagongalo shetu omambo. Oombimbeli dhOshindonga 6 nEimburiro mOshiharerero. Omo ge li moshinyangagongalo shetu taga longo. Oonakuthikitha oyo mbaka taa landula mpaka:

1. Abia Amadhila
2. Nikanor Lungameni.

Tangi aaholike ne amuhe. Otatu mu halele omayambeko gomuwa.

**Medhina lyegongalo  
Markus Amushila**

### **ORAATA YEENGELEKI (WCC) MUAFRICA**

Oshoongalele oshititano shOraata yEengeleki mounyuni (WCC) oshi li ko 22 Novomba fiyo 10 Desemba muNairobi shaKenya neudo. Oraata ei ya totelewe konima yeedula 26 ohai ongala omudo omutitano keshe.

Ovanhu 2,500 okwa teeelwa va ka kale moshoongalele eshi. Ehangano eli ola fikama mEengeleki 271 domaitavelo e lili noku lili domoilongo 90.

Oshipalanyolo shOshoongalele: "Kristus ta mangulula nde ta hanganifa yo." Otashi ka kundafanwa mekwatafano neembinga dikwao 6 ngaashi:

1. Okuhepaulula Kristus mounyuni wopena.
2. Eshi hatu shi pulwa moukumwe pefimbo eli.
3. Okukonga ekwatafano navakwetu.
4. Omufyuululwapatuko nomadiladilo ovanhu.
5. Outeku wemanguluko nekwatafano novanhu.
6. Oilonga yonyanya nekondjo lemanguluko.

Omapulo makwao a fikamena onyuni mefimbo eli, otaa ka kundafanwa yo ngaashi; ondilo mounyuni, ondjala, omahepeko ovanhu nonyanya yovapangeli tai monika moilongo ihapu.

Hamushanga Ndjai woukumwe wEengeleki muAfrika (AACC) Canon Burgess Carr, okwa ti kutya oshoongalele osho otashi ka kala naana shopaafrika.

Kenya osho oshilongo shotete muAfrika sha mona omholo i fike apa tamu ongalelwa koshoongalele shounyuni aushe. Oshilongo shovanhu eemiliona 13, Kenya, osha hangikile kevaengeli 1844 Paife eepelesenda 67 ove li ovakriste fimbo eepelesenda 26 ovapaani.

MuKenya omo yo mu na ombelewa yakula youkumwe wEengeleki daAfrika.

### **OSHILONGA SHEKWAFO LOTETE**

Ekwafo lotete olo ekwafo tali pewa omunaudu manga ondohotola, omupangi ile oshihauto shovanauudu (ambulanisa) inashi fika. Elalakano lekwafo lotete okuxupifa omunhu ka fye. Okukelela yo omaehamo, opo omunhu a kale nawa.

Ope na hano ehangano eli li li mounyuni aushe, la kwatela mo oiwana 78 omo SuidAfrika naye a kwatelelwa mo yo. mOvenduka oli na mo ombelewa yalo nahamushanga. Omu na ovo hava ende nokuningila ovanhu etundi peenhele nokweenda nokutala ava tava mono oiponga noku va kwafa. Ndele eshi otave shi ningi kehalo lavo vene nopehee na ofuto yasha.

Ongeleki mOwambokavango nayo oya dimbulukwa oshinima eshi, noye shi tala shi na oshilonga notashi kwafa ovanhu. Onghee oye lilongekida nova tuma yo ovanhu vamwe vomOngeleki, neudo opo va ye ve ke lilonge kwinya nghee omunhu e na okukwafwa ekwafo lotete, fimbo ina fika moshihakulilo.

Ediladilo la tya ngaha, ola li la hafelwa unene. Ovahololwa ove lilongekida nova denga nondjila yavo va ka pya ko kOvenduka. OIweendo la tya ngaha okwa li la kwatelamo ovalongi veefikola: Wilhelmin Amweelo, Maria Nakafingo, Klaudia Hauuanga nomuhokololi.

Fye ava twa ya kokursus ei, otwa dimbulukwa nghe ohole tai dulu okulongifa omunhu oilonga ikumwifa. Osheshi ehangano eli itali kwafa ova-shiivikile ashike, ndelene ovanhu aveshi. Mulo kamu na okatongotongo kasha. Ola fa tali tale nokutya omukwetu oye omunhu ou a pumbwa ekwafo e shiivike ile ehe shiivike.

Okwa li she tu hafifa unene okukala kwinya kOvenduka. Otwa longwa nawa notwa pewa onongo uhapu. Okukala kwetu kwinya kakwa li oshimha, ndele eshi twe shi pewa otwa dja ko nasho nohatu shi longifa keshe tuu opo hatu dulu.

**Saara Shikeva**

### **OMUKWETU**

Oye oshifo shOngeleka onkwaevangeli paLuther yomOwambokavango. Ohashi nyanyangidhwa mOniipa. Omukuluntu gwoshifo omumbisofi dr. Leonard Auala. Amushanga Rev. Sebulon Ekandjo.

Ondando yoshifo komumvo muSuidwes nomuAfrika alihe R 1. 00 kombanda yomafuta R 2. 00.

Oondando nomambesitelo naga tumwe kOmukwetu Oniipa; P/B. 2013, Ondangwa.

Omatseyitho agehe gomuntu mwene ohaga futiwa kumwene.

OWAMBOKAVANGO CHURCH PRESS  
PRIVATE BAG 2013, ONDANGWA S. W. A.  
9270